



# PLANTER

MOTTO : "PRO-CHRISTI ET ECCLESIA" (FOR CHRIST AND THE CHURCH)

Estd-5.2.1982



## Highlights

### FELICITATION HUN HMAN ANI

June 7, 2024 (Zirtawpni) chawhnu dar 1:00 khan School leh SHSS Alumni-te buatsaihin School Multipurpose Hall-ah Felicitation hun hman a ni a. Hemi hunah hian kumin HSLC result chhuaka kan School Topper, HSSLC Arts a Top Ten-a lang pathum te, Subject Topper te, Arts & Science-a kan School Topper-te hnenah chawimawina thuziak leh pawisa fai hlan an ni a. Hun hman zawh hnu hian thawktu te, Alumni atanga lo kal te, chawimawite leh anmahni tawiawmute'n chawhlui an kilho a ni.

### COACHING CAMP-AH TEL

May 11-25, 2024 chhunga Vadadora, Gujarat-a Advance Coaching Camp Table Tennis neihah kan zirlai pahnih- Benjamin Lalramchanmawia, XII/E-50 leh H.P Lalsangliana, X/B-96 te an tel ve a. State 10 vel atangin mipa leh hmeichhia 33 vel an ni. Camp tawp lamah hian Tournament buatsaih a ni a, hetah hian Benjamin-a hi champion-in, undefeated record a siam nghal bawk a ni.

### ZIRTIRTU THAR

Kan School chuan zirtirtu thar kan nei a, June 3, 2024 khan a rawn zawm. High School lam zirtirtu tur a ni.



**Hming** : James Lalnunzira  
**Kohna** : James  
**Pa hming** : P.C Zothanpianga  
**Thiamna** : M.A.(Mizo), B.Ed  
**Veng** : Ramhlun North, Aizawl  
**Birthday** : January 23  
**Vacancy** : Full Vacancy (99.9%)  
**Ei duh zawng** : Pai tawih theih chi tawh phawt, hmarcha thak erawh ei ngam lo  
**Rawng ngainat zawng**: A dum leh a sen, Pink erawh ti thei thak lo.

## THISEN PE THA LAWMMAN PAKHATNA KAN SCHOOL NSS UNIT-IN KAN DAWNG

**19<sup>th</sup> June, 2024 : Mission Vengthlang, Aizawl:** June 14, 2024-a Association for Voluntary Blood Donation (AVBD) leh MSACS te tangkawpin, World Blood Donor Day puala damlo mangangte tana tlawmngaia thisen petute chawimawina hun, Vanpa Hall-a an buatsaihah; Educational Institution Category (HSS level)-ah kan School NSS Unit-te chu thisen Unit 276 zet pein pe tha ber kan ni a, lawmman hlu tak hi kan dawng a ni.



Hemi hunah hian Pu Lalsiammawia Fanai, Principal; kan School NSS P.O panga- Dr. Vanlalvanga Ralte, Pu C. Lalrintluanga, Pu Joseph Vanlalhruaia Sailo, Pu C. Lalrochhara leh Pu Lalthantluanga Chawngthu te bakah Class XII D leh XII E zirlaite an kal a ni. Kan School-in AVBD leh MSCAS te buatsaih lawmman pakhatna hi a zawnin tum li kan lakna a ni.



World Health Organisation (WHO) chuan Blood Group hmu chhuaktu Karl Landsteiner pian champhaphak June 14 chu World Blood Donor Day-ah puangin, kum 2004 atangin hman tan a ni a. Mizoramah chuan kum 2007 atangin hman tan a ni thung. Kum tin thupui hrang hrang neih thin a ni a, kumina thupui chu '20 years of celebrating giving: Thank you, Blood donors' tih a ni.

He hunah hian thusawi te, zai te, thisen pe tam leh dawng tamte hnen atangin ngaihthlak a ni a. Kalkhawmte pawhin an hlawkpui hle a. Kan zirlaite pawhin nungchang tha leh thuawih taka he hun an chhim thei hi a lawmawm hle a ni.

*Editor*

Lalthantluanga Chawngthu  
Mb. No. 8014344688

*Joint Editors*

F. Lalrinzuala  
Vanlalremruata

*Cir. Managers*

Lalrinzuali  
Rebecca Rosangpuii  
Esther Lalruatkimi

**Editorial****Board***News Editors*

Lalrintluangi	XII/A-7
Lalrinzuali	XII/C-1
Mesak Lalrinhlua Varte	XII/C-34
Remruatfela	XII/D-65
Marcus Lallawmawma	XII/E-69
Lalthianghlimi	XII/F-45

**Editorial...****THU LEH HLA ṬHA**

Thu leh hlain a ṭha lo lama nghanwng a neih ṭeuh theih lain, a ṭha erawh chuan nun a hruai nasa hle thung a. Benjamin Franklin phei kha chuan “**Khâwl ha 26 min pe ula, khawvel ka hneh thei ang**” a lo ti hial a ni.

*Jesuit* pawl din chhuaktu, Catholic puithiam Ignatius-a khan kum 1521-a Pampiona indonaa a hliam lai, eng mah ti thei lova a awm lain Ludolph-a ziak **Life of Jesus** leh Jacobine-a ziak **Flowers of the Saints** tihte a chhiar a. Chu chuan a nun her danglam tirin Pathian tana rawngbawl turin a inpek pumhlum phah ta a ni.

Mi thianghlim Augustine-a, Kristian sakhaw rawngbawlnaa mi ropui em em khan Athanasius-a lehkhabu ziah **Life of Antony** a chhiar aṭangin rawngbawl turin a inpek phah a ni.

*Kristiana vanram kawng zawh (The Pilgrim’s Progress)* tih lehkhabu hmingthang tak mai, John Bunyan-a’n a ziah theih chhan pawh hi a nupuiin a rawn chhawm lehkhabu pahnih **The plain man’s pathway to Heaven** leh **The Practice of Peity** vang a ni an ti. Heng lehkhabu pahnih a chhiar aṭangin Pathian ngaihsakna a neih phah a. Bedford tân ina a tân laiin he lehkhabu ropui tak hi a ziak ta a ni.

Myanmar (Burma) ram thim taka Missionary ropui Adoniram Judson-a nun tidanglamtu chu lehkhabu pakhat **The Star of the East** vang a ni an ti.

**GREEN MIZORAM DAY HMAN A NI**

June 11, 2024 (Thawhlehi) khan kan School NSS kaihhrainain Green Mizoram Day hman a ni a. A hawna hi School Multipurpose Hall-ah neih a ni. Hun hman zawh a nih hnu hian Class XII-F zirlaite leh NSS P.O te’n Science Building thlang chu sam faian thing ṭiak 40 vel phun a ni. Pu Lalsiammawia Fanai, Principal chuan thing ṭiak hi a phun hmasa ber a ni.



Kum dangah chuan Green Mizoram Day hi Lungsai, Maubuanga kan School NSS Plantation hmunah zirlaite nen hman ṭhin a ni a. Amaherawhchu, kuminah hian kawng dinhmunte enin zirlaite kalna chiah ngaih a nih loh avang leh, kan School hmunhmate’n min zawh tho avangin School-ah hman a ni thung ta a ni.

Sir Davida te, Miss Rintei te, Miss Muanpuii te, Sir Hmingsanga te leh zirlai thenkhat hnen aṭangin thing ṭiak phun turte dawn a ni a, a lawmawm hle a ni. School NSS Orchid Park hi hemi ni hian nauban ṭahnem tak dah belhin, a hmunhmate lei laiin siam rem leh a ni a. Pangpar khawina hmun tur pawh dawh zawl nghal a ni.

**BHASHA SAMMAN 2023 DAWNG DAWN**

Sahitya Akademi-in India ram chhunga hnam hrang hrang ṭawng tihhmasawn leh hausak kawnga thawk ṭha Bhasha Samman 2023, Mizo zinga dawng turin kan School Principal (2008-2015 chhung) hlui Pu Rozama Chawngthu leh Pu R. Lalrawna te a thlang. He Sahitya Akademi chawimawina sang dawng tura thlan an nih thu hi June 15, 2024 khan puanzar a ni. Mizo zingah he chawimawina hi Pu James Dokhuma (1997) leh Pu B. Lalthangliana (2013) te chauhvin an la dawng a ni.

**CHERAW KÂN ZIR**

A ṭum hnih nan C.C.A Programme-ah Ni 14.06.2024 (Zirtawpni) chawhnu khan School naupang te’n Cheraw kân an zir leh a. A thiam tawh sa te’n a la thiam lo te an zirtir a ni. Zir hmasak khan mau kan indaih lo deuha a lan avangin mau pawh ṭahnem tak lei belh a ni.



## Article

**'FAILURE HIHLAWHCHHAMNA'  
AN TI EMNI?***-Dr. Vanlalruata (2016-2017 Batch)*

Tu nge ka nih hre chiang lo hi chuan, "Ruata hi chu a thiam thei alawm," an ti leh ngawt zel a. Mahse, kei zawng, thiam thei ka inti ve ngai lo reng reng. Pawl khat ka nih atangin kum tin term khat tal chu ka fail ziah! Pawl nga ka nih tum pheii chuan Term thum ka fail a, min promote ringawt!

Pawl sawmpakhat ka nihin Synod HSS-ah ka rawn lut ve a, chumi kum pawh chuan first term-ah Maths leh Physics ah ka fail a, 2<sup>nd</sup> term-ah Maths-ah ka fail hram a, 3<sup>rd</sup> term-ah erawh Maths-ah pass mark chiah chiah ka hmu. Han ngaihtuah let hi chuan min belh pass chiang mai! (Ka lawm e aw, min belh pass tu).

Pawl sawmpahnih ka nihin eng tin tin emaw 1<sup>st</sup> Division-ah ka pass ve hram a, kan lawm khawp mai. Mahse, NEET UG ( Daktawr zirnaah) ka fail leh ta hram a! Huiz, beidawnthlak thin mang e! Khami kum pheii kha chu natna neuh neuhin min tlakbuak a, duh ang paw'n coaching ka kal hlei thei lo. Mahse le, naupan tet atanga daktawr nih tum na na na chu a kum leha NEET UG chu ka bei leh a, vanneihthlak takin ka tling ve hram a.

Han tlin takah chuan kan tluang ve deuh tawh ang chu tih nak alaiin, zir tur a tam turu si; thumal thar hriat ngai loh zir tur a tam turu buru: cystic swelling, hydrocoele, krebs cycle, liver function, karei Lucknow, a va har si em! Class test tam zawk kha chu pass pawh kan tum lo, a hma aia mark tha zawk chauh kan aim ngam a nih kha; chu pawh, tihchhiat zawk chang a tam a, bei kha a va dawng thei tak! Fail chang lah a tam a. Mahse le, beidawng duh lo ta na na na chu heti hian Daktawr chu kan ni ta mai dawn chu a ni si a. Lalpa, ka va lawm em!

Thu ziak mi ka ni lem lo va, ka thu ziah te pawh chhiar hrehawm deuh te pawh a awm ang. Mahse le, mi sel tur tal paw'n ka rawn inphochhuak ve tawp a ni. Eng pawh ni se, ka sawi tum ber chu **Failure hi hlawhchhamna a ni lo. I fail avang khan i hlawhchham dawn lo, zam mah suh che. Fail fail mah la, i tum i chiana i duh a nih phawt chuan i hlawhtling ngei ngei ang.** Bible pawhin, "Dil rawh u, tichuan, an pe ang che u. Zawng rawh u, ti chuan an hmu ang. Kik rawh u, tichuan, an hawn ang che u," a tih kha. Beidawng lova i beih phawt chuan i va han hlawhtling dawn em! Ka lawm e.

*(ZMC-a MBBS First Batch, kan School chhuak zinga miin thu tha tak a rawn ziah avangin kan lawm hle mai. -Editor)*

**YMA DAY HMANG**

Kan School Boys' Hostel leh Girls' Hostel te chuan an lo tih thin danin June 15 khan YMA Day an hmang a. YMA Day pual hian hnatlangte an nei a. Programme te siamin hun hlimawm tak an hmang.

**DIFFERENT QUOTES***by Different Thinkers*

☪ Hringnunah hian i mit latu tam tak a awm ang a. Chung zinga tlemte chuan i thinlung a la ang. Ka mit nge ka thinlung i lak zawk erawh ka hre thiam lo!

*-Lalthuangkima, XII/C-33*

☪ I sawi fiah nan eng dang a ngai lo; thil tha sawina i ni si a.

*-Monica Zoramsangi, XII/C-9*

☪ Every class has a person who sacrifices his future just to make us laugh.

*-V.L.Malsawmtluanga, XII/C-41*

☪ There is no one in this world who has not been grabbed by the clutches of comparison.

*-Mesak Lalrinhlua Varte, XII/C-34*

☪ Hringnun hi chu a harsa alawm, kan vawi khat hmanna chiah a la ni si a; i inhre thiam tawn hram hram ang u.

*-Rodingliana, XII/C-38*

☪ Khawvela nun awhawm ber chu Lal Isua nena len dun nun neitute hi an ni.

*-Zonuntluangi, XII/C-27*

☪ If you're feeling down, remember, the God of the universe, the creator of earth, the creator of the biggest things, the creator of the smallest things, looked at earth and thought that it needed one of you.

*-Vanlalchhuanawmi, XII/C-21*

## Poem

**IYMAANGU***-Lalmuanpuii, XII/B-19*

Ṭanpui ngaite ṭanpui turin a lo ding sakhming YMA,

Rethei, hausa a thliar lo;

Chhulkhat chhuak Zofate tan a ni.

Chhiatni thatni-ah kan inlawm tawn,

A zalen e, Zonun ze mawi.

Hmasanga pipute'n zaia an lo chawi,

Tlawmngaihna par ang a vul bung e;

I zar hnuaiah Lengi leh Vala te kan leng e,

Hei lo liam awm maw?

Rangkachak leh lunglu aiin a hlu zawk tlawmngaihna,

Kan chawi ang che, sakhming tha hluan,

Ṭanpui ngaite ṭanpuitu YMA kan ti ang che.

I sakhming ram tin kil tinah thang se,

I mawina leh i rimtuinain leilung luah khat rawh se.

Mahse maw! Hmana pi pute hun laia i hmel mawi tak,

Rose par ianga par mawi,

Kan ram kan hnam timawitu kha;

Thliar hnu par ang a chul zo ta.

Ṭhangtharte u, i harh ang u, khua a tlai hma hian.

Tlawmngaihna par ang tivul leh turin,

Kan thiamna leh finna timawi zualin,

Tlawmngaihna kan thinlungah lo cheng leh se.

He kan Zoram, 'ka ram' ka tihna hmunah hian,

Kum tam pawh ral mah se;

Zamual liam lovin ding reng rawh,

Aw, tlawmngaihna hlu.

YMA vul zel rawh se.

## Article

**KAPHLEIA KHA***-Lalpekhlua, XII/E-66*

“Kan dam rei leh rei loh hi kum te leh thla te hian a hril lo ve, kan thu leh hla, kan thil tihin a hril ber zawk a ni. Mi, kum tam tak pawh nung mah se, thenawm khawveng tan leh, a ram tan thil tha a tih si lohva, thufing a sawi si loh chuan tu nge a dam hria ang? A thih veleh miten an theihngihl nghal ang. Mi fing ten mahni ram tana thil tha ti a, thu tha leh fing hril chhuak tute erawh chu khawvelah hian nung rei lo mah se, an thih hnu pawhin an nung reng ang, chu chu a ni dam rei chu.”

Mizo thu leh hlaa lungphum pawimawh tak, Zoram hmangaih em em tu leh, a thiamna leh theihna te nasa taka hman tum, mahse hmanna tura hun nei ve ta lo ‘**Kaphleia**’ (ngawr natna avanga kum naupang taka fam chang ta) chanchin tlangpui leh, a nun atanga zirchhuah tur kan neih te han thlir ho ila.

Kaphleia hi **January 10, 1910-ah** khan **Thiak** khuaah a lo piang a, a pa chu Pu Chhingvunga a ni a, a nu chu Pi Chuailovi a ni. An unau za hi pali an ni a, unau paruk an piang na a, pahnih chu an sen laiin an boral hlauh a ni.

Kaphleia hian Sialsukah pawl thum thleng a zir a, Aizawlah Middle School a kal leh a, Govt. High School, Shillong-ah zir zawm turin a kal a, **July 8, 1931-ah** a thleng a, kum **1932-34** chhung a cheng a. Matric a exam hnuin Tachhipah a haw a, **May 20, 1935-ah** a nghet lovin M.E School-ah a thawk tan a ni. **June 1, 1935-ah** Matric a pass tih thu a hre bawk a ni. Scottish Church College, Calcutta-ah 1<sup>st</sup> year I.A leh 2<sup>nd</sup> year I.A (1935-37) a zir bawk a ni.

Diary ziah a taima hle a, a fakawm em em a. He a chanchin ziahna bu atang hian a nitin nun hman dan te, thu ziak lama a sulhnute leh a nat dan tlangpuite kan hriat theih phah a ni. Tin, Kaphleia hming sawi chhuah apianga hming lo lang ve thin, **L.Biakliana** nena an intawn dan leh ‘**Inte Thawveng**’ a an chen dun dan chanchin te pawh kan hmu bawk.

Thu ziah lamah hian a inhawng hma hle a, Shillong High School a kai lai 1932 bawr chho atang hian chanchinbu leh Tlangau bua chhuah tur thu ziak thahnem tak a thawn tih a diary atangin a hriat theih a ni. “**Thlirtu**” tih thu ziak, rilru khawih tak pawh hi **April 11, 1931-ah** ziak tanin **September 24-ah** a zawh thu pawh a record diam a, mahse **November 8 leh 10, 1938-ah** a ziah belh leh thu kan hmu bawk a ni. “**Thlirtu**” hi Essay puitling tha tak, Mizo tawnga Essay hmasa ber ni zui ta a ni nghe nghe.

Calcutta-a a awm lai **July 14, 1937-ah** “Ka khua a sik” ti a a record hnu atang hian a dam chian theih tak reng reng loh avangin Shillong-ah a chho a. Ngawr natna a lo nih avangin inkai darh palh hlauh

thilah 1937 khan Mizoramah L.Biakliana nen an lo hawng a, hetah hian Kaphleia chuan, “Thi turin ka lo hawng e” a ti hial a ni.

Heta an thian dunrawn haw hi Durtlang Hospital gate chhak, choka awmnaah hian in te an saksak a, “**Inte Thawveng**” an vuah a, an cheng dun ta a ni. He “Inte Thawveng” atang hian Mizo literature-a thil pawimawh tak tak a rawn chhuak a. Kaphleia chuan Mizo Essay puitling hmasa ber ‘**Thlirtu**’ chu a rawn ziak ta a, A thianpa L.Biakliana pawhin Mizo tawnga thawnthu (Novel) kan neih hmasak ber “**Hawilopari**” chu a rawn phuah chhuak ve bawk a ni.

Hla tha tak tak leh thu tha tak tak phuah si hi a insit hle a, a Essay ziah ‘Thlirtu’ ah chuan amah leh amah chu, “Khawvel hi eng nge ka hnutchhiah ang? Ka ram hi eng nge ka hnutchhiah ang? Hnahthel ro angin ka tla bo mai dawn em ni?” ti tein a inzawt nasa hle a, “Fapa tlaktlai lo, hrin man awm lo” a inti hial bawk a ni.

Heti khawpa Mizoram tana inpe, kum 30 lek dam si a thu leh hla tha tak tak haichhuaktu hi a insit a nih a, hrin man awm lo a intih si chuan kei ang, hnunga kawlek thai ve mai mai tan chuan chhuan tur a va neih loh theih em! Mahse, kan indawm kun bik mai lo ang. Mite hmaa kan hmingthat ve theih dan tur kan zawng ang.

Ka theih tawk thil tha eng nge ka tih ve ang? Zoram tan hian eng nge ka tih ve ang? Kan School tan hian eng thil tha nge ka tih ve theih ang a? Engtin nge mite thinlungah kan nun ve reng theih tal ang le? A chhanna chu kan kawlk theuh si a!

## Poem

**GRATITUDE***-Deborah Lalnunsangi, IX/A-23*

This life of mine, a total mess;  
My story, an incredibly painful epiphany;  
A crowded mind craving for silence,  
Was bought to a peaceful tranquility;  
All because of them, the one I call “My Friends”  
Because of them I learned to live;  
To write my story happily,  
For which I am highly obliged to them;  
For making my life better.

**CHHANNA TAWI**

Tum khat chu Russian thu ziak thiam hmingthang Leo Tolstoy-a hian dawhtheihna leh ngilneihna hlutzia a sawi a. A sawi zawhah a ngaithlatute zinga pakhat chuan, Ramhnuaiah sakeiin min rawn bei thut se, engtia tih tur nge? Beih let ve a thiang em?” tiin zawhna a zawt a. Leo Tolstoy-a chuan thil dangin a chhang lo, “Chutiang chu a thleng khat khawp ang” tih zawng hi a chhanletna chu a ni!